

古豐識畧卷二十二

分巡歸綏等處兵備道長白鍾秀石帆

初稿

原 揀 選 知 縣 崞 縣 張 曾 小 袁

地部

濟卹

養濟院 在歸化城西三里乾隆初遵照部咨設立

額養貧民百名每名日給米一升歲秋季給布一

疋自九月起至二月上止給薪炭銀共四十餘兩院

頭一名歲給工食銀七兩二錢其米由官倉及義

倉按月支放銀兩布疋土默特戶司會同巡檢發

古豐識畧

地部 卷二十二 濟卹

一

給

又濟生店在隆壽寺側

滷澤園 在歸化城南東嶽廟側嘉慶中監司德公

諱綸建立嗣蒙古施舍地畝商民添蓋房屋為殯

葬厝棺及看守人居住之所其旁另築磚洞收存

無棺屍骸每歲清明中元前三日將屍骨啟出攢

葬以免暴露并狼犬殘食其各州縣及各行業所

另建者如代州墳梨園墳雞頭墳之類尚有數處

各廳義冢亦不一而足未及備載

按發政施仁必先無告濟卹之道匪止一端而

養生送死如養濟院漏澤園尤其大者我朝自綏遠城設立駐防官兵以來於八旗滿洲蒙古有孀婦孤女銀米有四王莊地撥給墳塋於土默特有賞給鰥寡孤獨地畝租銀

聖恩至優極渥口外雖五方雜處而濟卹各典與腹裏府廳州縣皆同中外毫無岐視惟歸化城人數衆多無業游民凍餒至死者不可勝計隆壽寺街開設窮民小店數十家乞丐每日得錢數文藉資棲宿遇有疾病無以餬口輒拋置寺前土人呼為大坑每氣息尚未斷絕而負屍者已

棄擲漏澤園磚洞中其負屍之人土人名曰灰堆言之實堪悽惻雖文王復起不能使恩澤普遍遐荒而因流溯源在禁止開設賭場一事蓋歸化城賭博場店非若別處豪侈者流特無衣無褐諸人偶得傭資數十文或尋覓親友沿街求乞覓得數錢希圖壓寶贏餘以母博子故俗傳有一錢壓十寶十箇駱駝馱不了之語卒之來回展轉盡歸抽頭者所得眼鏡肚餓窮凍以死無知愚民輒墮其術而不悟是在守土者嚴立禁示勿俾為羅網之張有力者復廣設條規

傳諭居民鋪戶施米粥及破敝衣履而勿施錢
以自圖省事更推設全節育嬰等臺捨藥材棺
木等局禁止鴉片烟館及冬月典鬻看身襖袴
則終歲所全活者自此多矣安得盡人而聽斯
言與更聞有各處游民死後無力歸葬暫行寄
埋數年後子弟親族輒將屍骨燒化成灰用囊
盛貯攜帶旋里旁觀且以孝義目之謂合於首
邱之禮嗟乎生既不能豐衣足食歿復遭此焚
燬之慘魂如有知寧甘為餒鬼於他鄉亦未必
願受祝融之虐也現擬出示禁止違者照毀屍

例治罪